

從

野

堂

存

稿

序

余年十四而讀當時  
繆先生之文維時先  
生已偃蹇名場無聊

特甚又十七年而余  
與先生同舉進士廼  
辱先生引爲忘年之  
交切劘道義揚摧古

今至遭逆璫之禍檻  
車徵抵良鄉猶貽書  
錢少宗伯諄諄見念  
屬以相與有成迄今

追思之涕不禁淫淫  
也先生少負奇藻長  
爲聞人四方之學者  
負笈問業趾錯於戶

先生時拈微義出人  
意表其爲古文詞一  
本之天真不落前人  
窠臼晚歲文筆益老

氣肅而情淡讀之如  
對雅人法士整襟端  
立不覺浮斂而躁什  
也先生幼有至性篤

孝二親敦愛骨肉而  
殷於故舊旣以孤童  
奮起列爲顯人生平  
所遇學使者及郡邑



之良凡有風塵物色  
之目輶車所至無間  
存歿必登堂拜墓灑  
淚肅瞻雖在數千里

外拊存其遺孤然後  
已而於取友尤爲矜  
慎士不叅其神契卽  
拂衣去之知其可與

一定交終身不易也  
面目嚴冷對客落落  
穆穆驟卽之神情似  
不相屬者而用意實

獨至然當其中有所  
不可雖夙簪雅故引  
義規切強詞厲色至  
有敵以下所不堪者

而先生行意自如卒  
以此賈禍先生不恤  
也自爲諸生卽以天  
下事爲已任憂君愛

國之誠老而彌篤每  
當人材進退世道剝  
復之際有慨於中未  
嘗不拊几憤歎若其

身家憂也泰昌天啓  
之元二宮府多故婦  
寺牙孽亮邪比連蓋  
滄海橫流之勢成矣

先生與楊左魏諸君  
子晝夜屏營抽精殫  
慮奮臂嚼齒欲以二  
三書生氣力彌縫支



柱其間身爲質的觸  
穽陷坎至於殞身碎  
骨而不悔蓋天之所  
以成先生者如此忠

義之氣鬱盤于胸中  
而溢發于翰墨故其  
峭刻孤往之思清嚴  
秀拔之氣颯颯透紙

而  
出  
令  
人  
肅  
然  
起  
敬  
而  
不  
敢  
狎  
視  
信  
乎  
非  
本  
之  
天  
真  
者  
不  
能  
爲  
管  
杜  
少  
陵  
阨  
窮  
放  
廢

而一飯不忘君故蘇  
子瞻評其詩以爲獨  
得三百篇之遺旨若  
先生之文其庶幾焉

矣乎先生歿十年其  
長君褒其遺藁付梓  
而屬予爲序余惟于  
文無能爲先生役然

而願爲之不辭者以  
往咎辱先生之知得  
附姓名簡末以爲幸  
且使後之學者讀其

文以想見其人知先  
生爲未死也

年眷弟陳必謙頓

首拜撰

敘

西谿繆先生其生也修辭者尊  
爲百谷之海砥行者奉爲群岫  
之崗語幹濟者如族工執削聽  
指授於梓人辯材品者如百卉



參差鑒短長於止水其亡也如  
元禮孟博繫九鼎於東京如彥  
範束之浴新暘於唐服

天子追念其遺蓋販夫孺子咸想  
慕其英風不必俟之百代已與

高忠憲楊忠烈等壯河山而輝  
日月矣卽其館閣鴻製與贈遺  
小章雄深磅礴之氣求之

本朝方正學而外莫敢頡頏而  
余尤有感於先生之自敘也當

逆燄如燎楚毒備至勢不望生  
倘幾微有動於中不氣沮於害  
不可爲則憤盈於天之不弔已  
爾先生方倦懷我知啣情孺慕  
在三之誼九死彌敢至所云行

真而未篤口直而多躁心慈而  
色厲爲文有筆而無學爲學有  
志而無養卽不知於先生如何  
然抑心自問外若不見惡逆之  
可尤內若不見奇節之足炫此

何等時而先生若是謂先生不  
聞道吾不信也先生取友遍天  
下卽里閭後進稍堪接氣類必  
多方獎掖爲力於所不知如余  
迂訥先生每引之忘年其寄粵

督之語令當之者汗溢於額嗟  
乎先生髓腦塗於

父肝膽殉於友生乃門牆舊好  
片語睚眦影附新知時移意奪  
卽易名之典又應論定尚煩擬

議於秩宗誰爲後死者此尤余  
所咨嗟惋歎於先生者也長公  
采室直諒慨慷余對之宛見先  
生書此寄之附先生集末九原  
知己庶幾可作云

同郡友第張瑋頓首拜撰



奉直大夫左春坊左諭德兼翰林院檢討  
贈通議大夫詹事府詹事兼翰林院侍讀  
學士繆公行狀

錢謙益

曾祖王

妣惠氏

祖桓皇贈通議大夫詹事府詹事兼翰林院  
侍讀學士

妣桑氏皇贈淑人

父炷皇贈通議大夫詹事府詹事兼翰林院

侍讀學士

妣夏氏皇贈淑人

本貫常州府江陰縣東興里

天啟四年應山楊忠烈公劾奏逆閹江陰繆公  
在左坊羣小愬公於閣謂繆公與楊厚善老於  
文學奏草實出其手閹衛之次骨是年推公掌  
南院疏閣不下旋移疾乞歸勒令致仕明年坐

楊公獄詞牽連追賊又明年詔下急捕公公坐  
檻車取故紙敗筆籍記其平生使其子授子曰  
敢以是累後死者公歿予時時捧其書歎且泣  
曰予兩人同里同館同志同隸黨籍城西之亭  
北寺之獄行且從公而後何暇以餘生游覓理  
筆扎之責乎後十年予又坐黨放逐家居久爲  
之喟然而歎曰嗟乎予於公乃今可以言後死  
矣其可以已謹按公諱昌期字當時舉萬曆癸

丑進士選翰林院庶吉士丙辰授檢討請告歸  
里七年 熹宗初補原官主湖廣省試壬戌陞  
左春坊左贊善冊封建德王甲子復命陞左諭  
德是冬勒致仕又三年而有逮捕之禍丙寅四月  
某日畢命於詔獄今上卽位詔贈詹事追及其  
二世而蔭一子入監公之先爲嘗熟人居小山  
之湖橋國初徙江陰曾祖王父及王父皆爲儒  
任俠修長者之行其父母馴行孝謹饁耕相敬

有古儀法雖其聲名不出閭巷而鄉之言家風者歸焉公少負雋才邑令詔安胡士鰲賞異其文間知其父連染繫郡獄立請出之弱冠有盛名遠方宿儒多摳衣受業無錫顧端文公延致家塾端文前輩名家公與之上下議論才辯濫涌端文無以難也年三十九舉於鄉兩都人士聚觀歎息以爲衣冠有異如唐之李邕矣公與同年生顧雲鴻鏃礪志節以古人相期許予從

雲鴻識公於公車雲鴻歿經紀其喪事遂定交  
端文與高忠憲公關講堂於東林公退而語予  
東林諸君子有爲講學而有意立名黨錮道學  
之禁殆將合矣公旣登朝癸丑甲寅之間朝論  
攻東林黨甚急還觀其所爲壹皆便文養交蠅  
營狗苟附時相走私門惡清流清議爲害已欲  
鋤而去之者也公未嘗心許東林而疾黨人滋  
甚每歎曰吾惟恐人爲僞君子肯與人爲真小

人乎徃徃叶衡扼腕形於言色朝論遂以東林  
目公公弗辭也當是時予以史官里居群小畏  
予之出而忌公之翼予也曰必亟剪之是將令  
虞山速飛於是嫉者亦移師向公矣乙卯東  
宮挺擊之事御史劉廷元以風癩蔽其獄提牢  
主事王之采挾摘主謀御史劉光復主廷元議  
疏攻省垣之右提牢者公爲之評曰一御史以  
風癩二字出脫亂臣賊子一御史以奇貨元功

四字抹殺忠臣義士之衆慙以公言爲微延元  
頓足曰繆官史館安得司空城旦書耶吾屬他  
日無噍類矣明年將散館工垣劉文炳再疏侵  
公公甫拜官未上移疾歸又明年內計公與予  
竝中蜚語南昌劉公掌院力持之而止自時厥  
後予兩人取次爲黨人射的黨人之忌余甚於  
公而其恨公而欲殺之也尤亟於予則以挺擊  
前議也天啟初逆閹殺光廟伴讀安遂南昌福



清葉公召至公正告之以謂內傳不可奉顧命  
大臣不可逐公三朝老臣當以去就爭之力過  
其漸無令中人手滑福清迂其言領之而已又  
二年高邑趙忠毅公爲冢宰號召海內清名之  
士澄汰品流塞絕微倖公與高公楊公及桐城  
左公嘉善魏公叅預其議位置標榜傾動朝著  
朝右皆側目接手怨詛交作楊之草疏也公密  
告左曰內無永外無文襄一不中而國家從之

可幾倖乎左默然不應疏上福清言於閣臣曰  
此豎在君側小心一旦去之不可易得公勃然  
曰誰爲此言者可斬也福清色變而起號於人  
曰西谿欲殺我西谿公自號也福清口語籍籍  
流聞大內與草奏之說相應而公之禍不可解  
矣公罷歸未踰年劉廷元以副院入坐貶未竟  
旋被收考無何王之案亦考死廷元者故所主  
風癩御史也被收日出就廳事邑令岑之豹遽

前提其手妻妾不得訣別惟聞銀鐺聲琅然撼  
版扉慟哭徐傳語慰勞而出閤既飲章捕公織  
閣實誣奏始上且有收捕五人後命公中塗得  
之疾呼家僮曰虞山免矣喜見顏閒忘其身之  
在貫索也詔獄死狀秘外人莫得知四月二十  
九日橐籥中傳出寸紙自是而絕五月二日獄  
吏以死上竟莫知何日也正統八年六月閤振  
殺侍郎劉忠愍公球忠愍之亡以二十一日二

十三日家人始得聞其諱祭自二十二日後凡  
三舉蓋疑之也今公之絕命則未知其爲四月  
爲五月也而其家遂以四月二十九日爲忌辰  
忌辰一也劉則疑之繆則意之亡於禮者之禮  
孰是而孰非均可以痛哭矣其歛也十指墮落  
捧掬置兩袖中蓋閹以草奏故屬獄吏加桔萃  
焉其它楚毒備至又可知也閹自以爲得甘心  
於公不知其代人操刀爲議挺擊者釋憾也嗚

呼慘矣哉公天性純孝父末疾臥辱十七年午夜聞馨歎悵悵若梓曰撞肩趣整衣立牀下執喪致毀踰禮覃恩再贈皆以制詞屬予肅拜請乞涕泫淫覆面面也邦君大夫少受一言之知使車往來必枉道過其家哭其墓與人交推賢讓能救過分謗死喪急難爲之側席而坐作秀才時卽以民瘼吏敝爲已憂邑令賊罪狼籍官舍井闌唐李嘉祐手刻詩句載以歸楚任滿營

求保留公移書逐之去江陰民比屋謠呼曰繆  
舉人活我癸丑上公車無以辦嚴刺促借貸幾  
不成行雅不欲以廉潔自喜曰此細事耳樂易  
疎豁不立厓斥少而讀書於所謂西谿者旣貴  
誅茅種樹棲息其中度阡越陌與田夫牧豎偶  
語响濡疾苦爾汝相狎軒車造門意有不可直  
視旁睨手掇衣裾一揖之外忽忽不相酬對好  
爲人規切過失不少顛避或其人護前諱短面

頸發赤更刺刺不已信心而行衝口而言事過  
語闌如颺迴浪息都不省記而褊心之人驟而  
與之值者鮮不以爲深衷溪刻頗有鱗而胷有  
甲也同年進士醵金讌會戚里接席觥籌錯互  
公至兀傲據上坐視殺裁嗅茗椀卒發一語舉  
座愕眙失色久之欠伸思睡顧左右取馬去坐  
客始叫喚相慶更酌盡歡闔燭之方熾也士大  
夫或中立祈免公從衆中面數之其人赧而亡

從野堂存稿

行狀

去公顧問曰彼得無未喻吾指乎蓋猶以爲有  
隱乎爾也嘗爲人撰制詞或訴之曰彼賣公去  
矣一日來謁使人尾其後追還其名刺而焚所  
撰稿於通衢行人走卒填咽聚觀弗顧也初欲  
梃揚疏其旣上也匹馬過從朝於楊而夕於左  
閒弗往則雙藤以拒門往往離立長安道上停  
車拊馬戟手罵詈闔刺探已十餘曹公等故自  
若也生平不識酒醴不好歌舞客至設食糗糒



錯列儼皇雜進劇談極論移日分夜客皆踣倚  
假寐公方整襟危坐如味爽盥頰時權情僞計  
成敗揣摩天下事不失毫髮几席戶牖之間多  
受人欺紿瞻目顧視而已爲人謀周詳微密處  
分井然至於屏營箱篋籌筭錢穀心慵手懶雖  
庸夫稚子皆睨而笑之口多微詞兼好諧謔就  
急徵行至毘陵驛舍緹騎抹首鞞袴猙獰植立  
與客談時宰諂附高邑狀俯躬起立低聲折支

曲盡情態緹騎爲歡笑失聲其跌宕喁喁紆緩可笑多此類也讀書爲文不事訓故不傍注脚聊且繙閱通曉大意穿穴解駁別出新理陶淵書不甚解孟浩然學不爲儒庶幾近之虛懷下問自視歉然每語其門人子弟勸學曰無效吾腹笥枵然爲貧子拮拾度日也嗟乎世之高冠長劔大儒臚傳者多矣其亦知公之自命失學者乃所以爲善學也歟公生於嘉靖壬戌七月

既望其歿也年六十有五娶李氏累封淑人生  
男子五人女子五人李柔靜仁恕有婦德痛公  
遇難蚤夜呼憤得疾驚惑不嘗以死李有姪曰  
應昇官御史後公考死所謂收捕五人者應昇  
其一也考諸國史詞臣死閹難惟劉忠愍一人  
後一百八十三年而得公 天子既愍而恤之  
矣而易名之典猶有待焉或曰有尼之者也邇  
公之爲人篤於君親重於名節厚於朋舊慎於

取子是其所長也勇於爲人急於疾惡疎於防  
奸忽於酬物是其所短也其所短者雖有深讎  
積怨吹毛索瘢亦不過如此而已矣而其所長  
者耿然著明如秋霜夏日顧猶有異議焉何哉  
忠愍以血裙葬公以墮指歛死無皐復歿無家  
忌後先慘死冤動天日獄卒之殺忠愍者悔作  
逆天理事懊恨成疾未幾而死羅文恭公記其  
事今之士大夫讎公於死後曾不如忠愍之獄

卒是何可令文恭見也恭惟甲令大臣應得謚者禮部廣加咨詢積覈各實應謚而未謚者覆奏補給同非一人一時所得而專決也當都堂發議時予已罷歸無從奮筆彈駁謹撰行狀一通上之有司他日節行定謚廷辨可否庶幾可考信不誣謹狀崇禎八年七月望日舊史官常熟錢謙益狀

禮部擬謚揭帖

左春坊左諭德繆昌期直隸江陰人

擬謚文貞

道德博聞  
憂國忘死

一擬文毅

勤學好問  
強而能斷

欽點文貞

從野堂存稿

諭葬錄

維崇禎二年六月十五日

皇帝遣直隸常州府掌印官石萬程致祭於原  
任左春坊左諭德贈通議大夫詹事府詹  
事兼翰林院侍讀學士繆昌期之靈曰朕  
聞有用之學常處命而不渝無斁之思及  
追論而愈定維爾邁俗文藝蓋代經綸慕  
古節烈而愾死生早占大志當父病革而  
親盥頷已卜移忠石渠燃太乙之藜蟠腹

鼎揆弘業慈慶觸靈光之瑟憤膺城社狐  
奸禍始發於一鳴斤不啻乎三禩此志終  
不屈雖醺士日猶暢所欲言此賊誓必除  
與同道期惟願得一當謀之師謀之友深  
心可告天知罔顧身罔顧家厚毒尤勤國  
恤十八日備嘗楚趣金石爲流億萬年賴  
植臣綱姓名常懷酒醺醺而酌地表節義  
於顏淵靈其祇承副朕崇獎



原任左春坊左諭德贈通議大夫詹事府  
詹事兼翰林院侍讀學士繆昌期并妻李  
氏誥命

奉

天承運

皇帝制曰朕聞世道泰夔龍宣經國之猷天步  
艱逢干豎殉身之節我

祖宗奕世養士而光岳鍾靈本朝爰有文學侍

從之臣克以除奸死難爲事瞻言往躅哀  
不憖遺爾原任左春坊左諭德贈詹事府  
詹事繆昌期強學自厲秉德不回論道橫  
經著博文之譽綢書執簡存遺直之風遭  
讒遜迹於丘園眷主興哀於陵寢當其門  
下侍直時則閤豎借叢豺狼晝踞於朝堂  
噬我善類鴟鵂宵棲於宮禁啄及王孫爾  
懷宗廟社稷之憂慨申戮觀尸朝之義抗

言宰執不殉芻馬之嫌倡義同儕共効鷹  
鷂之逐及憲臣請劍之疏發而詞臣屬草  
之怨深始猶鉗錮於黨碑旋復張羅於詔  
獄嬰金鐵而斷肢體犴座之碧血如燐窮  
天望而極地藏江表之歸魂何日茲用追  
卹晉爾階通議大夫錫之誥命嗚呼孔氏  
之刑書但懸筆削南史之討賊不避誅夷  
爾先幾除惡角鷲蟲而不程勇慷慨捐軀

臨刀鋸而不辱命浩氣還諸天地忠心鑒  
乎

祖宗朕用揚爾德音永以著爲臣鑒

制曰忠臣之事主與賢婦之事夫也艱貞勞  
瘁相匹也實相伉況其捐糜國事漂搖家  
室而以幽憂婺女上下死生貴賤之際爲  
情獨苦者乎爾贈詹事府詹事繆昌期妻  
李氏淑儀維則靜德可嘉鳧雁興宜鳳著

御窮之日丹華不耀尤高屏貴之風及乎  
夫子殉身藐孤奔難悍吏追呼於坐賄先  
人不保其敝廬而爾寧甘竄迹於田間不  
改晝哭之遺則允矣內家之範何愧一德  
之求朕旣追念爾夫晉其階秩於地下豈  
其近遺爾德不以風異於後來用是封爾  
爲淑人嗚呼翟芾鞠衣知爾不以易纓裹  
環經之痛雲封芝簡維余用以報明星風

雨之勞

詔命

崇禎二年閏四月十九日

之寶

禮部爲欽奉

明旨優卹慘死諸臣以彰

皇仁以勵臣節事精膳清吏司案呈准祠祭清  
吏司奉本部送吏部咨開原任左春坊左  
諭德今贈詹事府詹事繆昌期卹典緣因  
該本部覆奉

聖旨這慘死諸臣高攀龍等俱著如議優卹該  
部知道欽此欽遵合就連送該司卽行直

隸常州府支給官錢買辦祭禮香燭紙遣  
本府堂上官一員前去致祭仍將用過官  
錢開報本部并戶部知數毋得因而科擾  
不便等因到司案呈到部擬合就行爲此  
劄付直隸常州府照依勘合內事理一體  
遵奉施行須至劄付者

計開

一祭文



一祭品 猪一口 羊一羖 饅頭五分

粉湯五分 菓子五色

每色五斤 按酒五盤

鳳雞一隻 燂肉一塊 燂魚一尾

酥錠酥餅

各四個

雞湯一分 魚湯一分

降真香一炷 焚祝紙一百張 燭一

對 酒二瓶止

工部爲欽奉

明旨優卹慘死諸臣以彰

皇仁以勵臣節事屯田清吏司案呈奉本部送  
准禮部咨該本部題原任都察院左都御史  
史今贈太子太保兵部尚書高攀龍等卹  
典緣因奉

聖旨這慘死諸臣高攀龍等俱著如議優卹該  
部知道欽此欽遵咨部送司查得慘死諸

臣業經禮部擬請

特恩加等優卹因復查高攀龍實係授二品文  
官例應差官送葬另行題請外案呈到部  
看得原任奉春坊左諭德今贈詹事府詹  
事繆昌期摛文經國簪筆匡時藝苑久蜚  
英聲狴犴今存碧血既經禮部題奉

欽依備咨前來相應覆請奉候

命下本部行移直隸常州府合將合用工料大

匠價銀照依後開擬定數目行屬派辦徵給喪家自行造葬仍委堂上官一員前去造墳處所依式督理造葬畢日將給過銀兩數目造冊奏繳等因崇禎元年七月初五日具題本月初八日奉

聖旨是欽此欽遵擬合就行爲此劄付該府照依勘合內事理遵奉施行須至劄付者

計開

原任左春坊左諭德今贈詹事府詹事  
繆昌期係贈三品文官該造墳工料銀  
二百兩夫匠一百名每名折銀二兩共  
該銀三百兩

繆太史從野堂存稿總目

第一卷

誥勅

第二卷

奏疏  
論策  
辨解  
原評  
對

第三卷

序記

第四卷

從野堂存稿

總目

墓誌銘 墓表

第五卷

傳 行狀 祭文 紀畧

第六卷

尺牘

第七卷

詩

第八卷 雜著

穆太史從野堂存稿卷之第一

誥敕

特進光祿大夫左柱國少師兼太子太師  
吏部尚書中極殿大學士葉向高 誥

命

大學士葉向高父 誥命

禮部尚書兼翰林院學士李騰芳并妻

誥命



禮部右侍郎兼翰林院學士丁紹軼 誥

命

禮部右侍郎兼翰林院侍讀學士溫體仁

誥命

資政大夫經畧遼東薊鎮天津登萊等處

軍務兵部尚書兼都察院右副都御史

王在晉 誥命

通議大夫刑部右侍郎楊東明 誥命

太常寺卿陳于廷 誥命

南京太常寺卿申用懋 誥命

提督軍務巡撫鄖陽等處地方都察院右

僉都御史畢懋康 誥命

太常寺少卿孫鼎相 誥命

太僕寺少卿孫居相 誥命

太僕寺少卿徐如珂并妻 誥命

南京吏部文選清吏司郎中王命新 誥

命

吏部文選清吏司員外郎周順昌并妻

誥命

山東布政司右叅政兼按察司僉事錢士

晉 誥命

吏部稽勲清吏司主事孫必顯父 誥命

吏部稽勲清吏司主事孫必顯 勅命

吏部驗封清吏司主事張其實 勅命

吏部稽勲清吏司主事金麗兼 勅命

吏科都給事中魏大中并妻 勅命

行人司行人宋鳴梧父 勅命

行人司行人李之椿并妻 勅命

原任國子監助教薛敷教贈官 勅命

浙江湖州府通判范永年 勅命

浙江金華府東陽縣知縣貢修齡 勅命

直隸保定府定興縣知縣王永吉 勅命